



## Situaziun da partenza

La scola porscha allas scolaras ed als scolar\* a Danis la pusseivladad da luvrar cun MacBooks Air. Quels apparats duein vegnir duvrai per differents aspects d'emprender. Il present contract duei reglar il diever dils apparats ed igl access als mieds electronics ed internet sco era il diever da tals. Il reglament vala da tut temps, ton per il diever en scola sco a casa.

\* (sequent vegn ord motivs pratics duvrau per scolaras e scolar la fuorma masculina)

## Diever dils apparats MacBook Air

### Art. 1 Possess e diever

Ils MacBooks Air ein possess dalla scola. Els vegnan registrai e marcai da quella. Ultra da quei ei la scola era responsabla per l'administraziun e la configuraziun. Mintga scolar dalla 5. e 6. primara, sco era 3. superiura retscheiva in MacBook Air marcaus individualmein per luvrar durant il temps ch'el frequenta la scola a Danis. Las datas ch'ei arcunadas sil sistem restan possess dalla scola. Ellas vegnan controlladas e survigiladas regularmein. Scolari han absolutamein negin dretg da sfera privata cul diever dil MacBook Air.

### Art. 2 Pensums dalla scola

Ils MacBooks vegnan administrai e configurai dalla scola. Plinavon porscha la scola ils updates necessaris.

### Art. 3 Diever digl apparat (hardware)

Ils scolar drovan ils MacBooks Air per l'instrucziun. Igl ei scumandau da:

- far midadas vid la hardware,
- metter taccaders ni decoraziuns vid igl apparat,
- brattar il MacBook cun auters conscolars,
- dismetter ni vender il MacBook

### Art. 4 Diever digl apparat (software)

Suandontas funcziuns / acziuns ein scumandadas:

- aschuntar ni eliminar applicaziuns (programs),
- crear in conto dad Apple Music ni Apple TV,
- midadas da configuraziuns (inclusiv dalla reit),
- sincronisar igl apparat cun in computer ordeifer la scola,
- stizzar il decuors dil browser (program Safari ni/e Mozilla Firefox -> internet),
- midar ni deactivar il plaid-clav.

### Art. 5 Donns

5.<sup>1</sup> Suandonts donns vegnan surpri dalla scola:

- donns da garanzia,
- donns caschunai senza cuolpa ni entras accident.

5.<sup>2</sup> Suandonts donns vegnan surpri dils scolars :

- donns caschunai per atgna cuolpa,
- donns caschunai per malprecauziun.

5.<sup>3</sup> La summa dil donn vegn mintgamai fixada dalla firma che procura il support.

#### **Art. 6 Enguladetsch**

Sch'in apparat svanescha ei quei dad annunziar immediatamein alla scola. Lezza interpreten ils pass necessaris. Las circumstanzas dalla situaziun vegnan intercuretgas individualmein. Ei igl apparat svanius ni vegnius engulaus muort malprecauziun, stat il scolar buns pil donn.

Il rapport da polizia ei la premissa per che la scola remplazzi igl apparat gratuitamein.

#### **Art. 7 Diever a casa**

Il diever dil MacBook Air a casa ei dependents dils suandonts facturs:

- ils geniturs han priu enconuschientscha dil reglament e lubeschan a lur affon dad era far diever a casa da quei apparat,
- il scolar ha la lubientscha dalla scola da prender igl apparat a casa.

Il diever dil MacBook Air a casa ei gratuits. Al scolar vegn plinavon mess a disposiziun gratuitamein ina tastga speciala da protecziun.

#### **Art. 8 Premissas pil diever dil MacBook Air a casa**

8.<sup>1</sup> Ils geniturs:

- portan la responsabladad pil diever dil MacBook Air a casa,
- han il dretg da mirar ni stizzar ils cuntegns,
- limiteschan il diever dil MacBook el temps liber,
- ein responsabels per tut ils donns caschunai vid ils apparats a casa,
- ein responsabels per la filtraziun dil cuntegn ni limitaziuns da temps sill'atgna reit,
- ein responsabels sch'igl apparat svanescha ni vegn engulaus.

8.<sup>2</sup> Ils scolars:

- prendan adina il MacBook Air cun els a scola (cargaus sufficientamein),
- astgan duvrar igl apparat cun outras colligiaziuns da WLAN; la scola porscha denton negin sustegn tecnic,
- tractan hardware e software cun tut quita.

8.<sup>3</sup> La scola:

- segida ed eliminescha eventuels problems. Mintga incap vegn protocollaus; drova in scolar pliras gadas quei sustegn, astga el buca pli prender il MacBook Air a casa.
- ha negina segirada pil diever pils MacBooks Air ordeifer il temps da scola. Donns cun consequenzas finanzialas van a donn e cuost dil scolar, respectivamein dils geniturs. (Mira artechels 5 e 6!)

#### **Diever digl internet**

Nus essan dil meini ch'igl internet seigi ina resursa nizeivla e che la scola e scolars duegien luvrar cun quei mied a moda positiva. Nus essan pertscharts dils prighels ch'il diever digl internet includa, denton ein ils avantatgs per la scolaziun aschi pesonts che l'utilisaziun digl internet duei era formar ina part dall'instrucziun.

Nus savein ch'ei dat buc ina sempla sliigiun tecnica che garantescha ch'ils affons lavuran online a moda segira. Il dretg secuntener sto vegnir emprius ed exercitaus sut survegionza. La scola ed ils scolasts ein pertscharts dalla responsabladad ch'igl access agl internet porta e sorprendan quella cun ina survegionza adequata.

Grondas instituziuns da scolaziun han fatg l'experienza ch'il diever memia restrictiv pertuc-cont filtraziuns d'internet tier affons e giuvenils fa buca pli segira la situaziun, damai ch'ella pren naven la responsabladad ch'ils affons ston emprender cul diever da novas tecnologias.

Perquei integrein nus l'utilisaziun da novas medias en nies mintgadi, setenend denton vid reglas claras e fermas. A quellas appartegnan:

- ina tenuta clara e transparenta ed in diever acceptabel che vegnan defini en in contract, il qual vegn suttascrets da geniturs e scolars,
- diever survegilaus,
- mesiras da protecziun tecnicas (p.ex. filter da cuntegns dubius),
- consequenzas disciplinaras en cass da surpassaments enviers il contract.

Nus lein tuts (persunas d'instrucziun, responsabel per ICT, menader da scola, scolaras e scolars) far tut il pusseivel per garantir in diever digl internet aschi segir sco pusseivel.

#### **Art. 9 Access alla reit**

Scolars astgan duvrar mo la reit ufficiala da WLAN dalla scola. Access alternativs (via telefonins ni autras reits) san buca vegnir controllai ed ein perquei scumandai.

#### **Art. 10 Reglas pil diever dalla reit**

Per tut ils utilisaders dalla scola vala:

- Adressas dad e-mail duein ins dar mo a persunas da confidanza,
- mintga adressa dad e-mail dad ina fontauna nunenconuschenta sto vegnir annunziada,
- vegnan cuntegns zuppai, obscens, permalonts ni schiglioc cuntegns inacceptabels scuvretgs, ston quels immediatamein vegnir communicai al responsabel per ICT,
- adressas ni numras da telefon audan buc ella reit, ni las atgnas, ni da conscolars ni da persunas d'instrucziun,
- vegnan fotografias ni videos cargai silla reit, astgan ils scolars buca esser numnai cugl entir num ed aschia restar anonims schi lunsch sco pusseivel,
- mintga access vegn survegilaus: datas, decuors dil browser (Safari, Firefox) ein accessibels da tut temps alla scola ed astgan buca vegnir stizzai.

#### **Art. 11 Diever acceptau e lubiu**

Ils scolars san duvrar la reit dalla scola per intents pedagogics. Quels ein defini suandontamein:

- instrucziun,
- retschercas,
- formaziun cuntinuada el sector scolaziun,
- administraziun.

Tut las lavurs che stattan en connex cun emprender, derasar savida ed augmentar las atgnas cumpetenzas ein giavischadas e lubidas.

## Art. 12 Diever scumandau

Igl ei scumandau strictamein da:

- dar vinavon ni modificar plaids-clav,
- crear e derasar maletgs e datas cun cuntegn permalont, obscen e scandalus,
- crear e dar vinavon material cull'intenziun da derasar tema ni currellas,
- crear e derasar material cugl intent da cuglienar,
- crear e derasar material che sa far donn a personas,
- adattar e derasar material ch'ei schurmegiaus entras dretg d'autur (copyright),
- crear e derasar material da marketing ni da massas per utilisaders ordeifer la scola (spam),
- dar access a personas buc autorisadas sin installaziuns ni purschidas (hackers).

Medemamein ein activitads specificas che han cun gronda probabladad las suandontas consequenzas scumandadas:

- sfartatar resursas dalla reit e temps da lavur da personas d'instrucziun ni d'emploiai pigl internet,
- donnegiar e demolir datas dad auters utilisaders,
- violar la sfera privata dad auters utilisaders,
- disturbar la lavur dad auters utilisaders,
- bloccar il survetsch per auters utilisaders (p.ex. cun surcargar igl access senza risguard -> sitecrashing),
- diever da software e hardware che ha procurau per disturbis ed ei perquei sclaus dalla scola,
- maldiever dalla reit da scola ni resursas da quella entras derasaziun da virus e malware,
- diever dalla reit da scola per donnegiar e devastar autras reits.

## Art. 13 Activitads sut survegionza

Suandontas applicaziuns (programs) ed activitads astgan vegnir exequidas mo sut survegionza e cun lubientscha dalla persona d'instrucziun:

- programs da chat (p.ex. "Nachrichten/iMessage" ni "FaceTime") e newsgroups per in pensum specific,
- la persona d'instrucziun sa era scumandar da scargar cert material,
- la persona d'instrucziun ei responsabla ch'il material cunterfetschi buc al dretg d'autur,
- plattas externas, DC e DVDs,

Agens downloads da scolars ein scumandai.

## Art. 14 Segirtad en la reit

Per francar ch'ils scolars semovien en parts adequatas digl internet e ch'els seigien buca exponi al prighel da cyber

- san las personas d'instrucziun far emprovas e controllar da tut temps il decuors dil browser e dil cuntegn dils MacBooks Air,
- astga il decuors dil browser (e cheutras l'eliminaziun dils fastitgs) mai vegnir stizzaus,
- suttascrivan ils geniturs in contract davart il diever acceptabel dils MacBooks.

## Art. 15 Pensum dils geniturs

Ordeifer la scola ein ils geniturs responsabels che lur affons semovien a moda segira egl internet. La scola sa bein informar davart rescas pusseivlas, denton support pigl internet a

casa sa ella buca porscher. Ils geniturs san s'informar tier las persunas d'instrucziun, sch'els givischjan dapli informaziun davart protecziun tecnica pli segira, litteratura ed auter. Informaziuns detagliadas ein d'anflar sut [www.safersurfing.ch](http://www.safersurfing.ch) .

#### **Art. 16 Diever da cameras**

Il diever da cameras ha liug mo cun lubientscha e sut survegionza dalla persuna d'instrucziun. Igl ei scumandau strictamein da fotografar ni filmar conscolars en zulers e sin plaz scola e cargar il material silla reit.

#### **Art. 17 Consequenzas disciplinaras**

Surpassaments encunter ils artechels numnai en quei reglament vegnan castigai rigurusamein tenor il management da conflicts dalla scola.

Ultra da quei san las consequenzas disciplinaras includer ils suandonts pass:

- scamond da duvrar il MacBook Air ordeifer la scola,
- restricziuns da duvrar il MacBook Air en scola,
- scamond da luvrar cun il MacBook Air,
- negin access agl internet,
- grevs surpassaments tenor artechels 10 e 12 san vegnir annunziai alla polizia.

#### **Art. 18 Vigur**

Quei reglament entra en vigur cun l'entschatta digl onn da scola 2019/2020.

Approbau dil cussegl da scola en seduta dils 16 da settember 2014, adattau sin entschatta digl onn da scola 2019/20.

Danis/Breil, ils 30 d'uost 2019

Il president



Sievi Sgier

Il menader da scola



Francestg Friberg

---